

Bunun hai Mapasisimul at mapasaumbabaas

A Masa habas daingaz dau tu niiang a Bununan haiap tu maaz bis suian hai mais sadu dau mas itu bunun tu sinsusuaz at sisinaipuk at iskusisia tu haimangsut hai mais na asa aming u'aizaan hai kausia aizaan tu bununtia makisaiv simul. mais simul dau hai maupatin dau tu mais simul dau mas pantauan tu babu hai asa dau tu mais taus'auhazin dau a babu a hai suhaisun a patauan a babu a at masuhisang tu tasa mas auhaz tu babu. Ung at, kilimang hanian mapatan'ali mas tainipantauantia mapakaun. Aupa habas a Bunun hai uka mas mahtu paisidaan mabaliv mas tulkuk hai mais sadu mas itu bunun tu masial tu tulkukn hai kaudii simul mas itu bunun tu maulubun tu tulkuk at mais taclubununin a malubun a tulkuk a hai mais masuhisin mas malubun tu tulkuk hai asa tu pavazun a susuaz a masaiv mas tainitulkuktia tu bunun at suhaisun amin a malubun a tulkuk a.

Masa minLipunin tu minhaipin a Bunun lakakangkang hai mais taunasainin sia lakakangkang mas pudanuman at uka mas hangvang tu na islakakangkang hai kausia aizaan mas hangvang tu bunun simul mas hangvang tu na islakakangkang. Mais simul mas hangvang hai asa tu pisi'alun a sinimul a havang a sikakaun at danulun mais islakakangkang. Ung at, mais kanahtunganin a huma a lakakangkang tu masuhis mas hangvang hai mapaska tus maaz tu titi at kilimang hanian mapatan'ali mapakaun mas tainihangvangtia. .mais nii hai mais taunasiainsia talpatazun a bunun hai

kaudii manaiav munghuma sia tainihangvangtia. Ung at, mais dunduan tu mapungav mas sinimul tu hangvang hai asa tu ma'uvai masuhis mas mungnagab mamaszang tu hangvang at mapa'is'av tainihangvangtia. Mais maupatia tu pankauman a huma a unhumauun hai kaudii simul mas huma tu na unhumauun. at maaz a sinimul mas huma a bunun a hai asa tu masaiv mas pilkadaantia mas tainihumatia at mais nii hai mana'iaiv munghuma sia tainihumatia. Mais simul itu bunun tu haimangsut hai asa tu suhaisun a sinimul a haimangsut a tutupa. mais mapungav mas sinimul tu haimangsut hai, asa tu masais maszang tu sinimul tu haimangsuttia. Mais makisaiv dau sia bunun mas bitahul tu iktus tu na isuaz hai asa amin tu mapaska tus maaz dau at mais nii hai masaunbaas dau mas maaz dau tu haimangsut mas paikisaivantia.

Aupa habs a itu Bunun a mailantatangus hai niiang mahansiap makusuitan i ukaang a suian at ukaang a babalivan mas haimangsut at asa tu kan'ank'anak ka'uni mas haimangsut, kan'ana'anak masuaz mas na kaunun, ka mais maupatia tu aiza pankauman hai kausia bunun makisav aupa simul aupa, hai tu, maaz a Bunn hai haiap masaumbaas mas sinimulantia at mahansip tu masamu mais simaazav siza,makismaazav makisav sia bunun.